

# Suri rumah kerjaya patut dibanggakan

**S**UMBANGAN suri rumah sepenuh masa kepada pembangunan negara tidak harus dipertikaikan kerana mereka turut membantu menjana sumber manusia yang mencecah berbilion ringgit.

Justeru, seperti kata Menteri Pembangunan Wanita, Keluarga dan Masyarakat, Datuk Seri Shahrizat Abdul Jalil sumbangan mereka dalam mendidik dan membesarkan anak tidak boleh diketepikan.

Masyarakat harus membuang jauh persepsi suri rumah tidak menyumbang kepada pembangunan negara. Kata Shahrizat mungkin ada kaitannya dengan syair Arab yang sangat terkenal yang maksudnya: 'Seorang ibu adalah sebuah sekolah. Jika engkau mempersiapkan dia dengan baik, maka sungguh engkau mempersiapkan sebuah generasi yang unggul'.

Tugas menjaga, mendidik dan memastikan teguhnya institusi kekeluargaan adalah satu tanggungjawab mulia. Teguhnya institusi kekeluargaan sering menyumbang kepada teguhnya masyarakat dan generasi yang akan datang.

Jelas sekali tanggungjawab dan beban tugas seorang suri rumah bukannya mudah. Betapa sulitnya menjadi isteri dan sekali gus suri rumah yang baik. Pelbagai peranan perlu dimainkan oleh seorang suri rumah di samping kemahiran yang perlu dikuasai.

Seorang suri rumah adalah seorang isteri yang bertindak sebagai ahli psikologi kepada suami dan anak. Tugasnya membantu suami dan anak mencari jalan keluar dengan memberi saranan, nasihat dan kasih sayang.

Seorang isteri juga menjadi tempat

curahan resah gelisah suami dan membantu suami meringan dan memberi jalan keluar terhadap masalah dihadapinya.

Justeru, suami perlu menghargai tugas isterinya di rumah. Mengiktiraf tugas isteri di rumah, tentu sekali memberi makna amat besar kepada isteri. Pengiktirafan dan penghargaan suami berupaya menguatkan lagi ikatan kasih sayang suami isteri.

Wanita sama ada tugasnya sebagai seorang suri rumah atau bekerjaya ternyata memberi sumbangan yang amat besar kepada pembangunan dan perlu diberikan pengiktirafan. Wanita dewasa ini perlu sentiasa bersedia untuk menghadapi segala bentuk cabaran bagi membolehkan mereka memberi sumbangan bakti dan berupaya memainkan peranan seperti diharapkan masyarakat.

Sumbangan dan sokongan wanita begitu diperlukan di dalam membangunkan masyarakat dan ekonomi negara terutama dalam menghadapi cabaran dalam era globalisasi. Keperluan itu terbukti melalui pelbagai bentuk peranan yang disumbangkan sama ada secara langsung atau tidak langsung.

Sumbangan suri rumah kepada pembangunan negara amat besar. Lantaran itu, wanita tidak perlu malu memperkenalkan diri sebagai seorang suri rumah.

Suami juga tidak perlu merasa malu untuk memberitahu profesion isterinya kerana bukan seorang peguam, eksekutif, doktor, jurutera, guru dan sebagainya.

**SAPORA SIPON,**  
*Universiti Sains Islam  
Malaysia (Usim).*